

Na osnovu člana 30. stav (1) tačka h) i stav (2) i član 38. Zakona o plaćama i naknadama u institucijama Bosne i Hercegovine ("Službeni glasnik BiH", br. 50/08 i 35/09) i člana 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), Vijeće ministara Bosne i Hercegovine na 91. sjednici, održanoj 17. juna 2009. godine, donijelo je

ODLUKU

O NAČINU I POSTUPKU OSTVARIVANJA PRAVA NA NAKNADU DRŽAVNIH SLUŽBENIKA ZA OBAVLJANJE POSLOVA DRUGOG RADNOG MJESTA U INSTITUCIJAMA BOSNE I HERCEGOVINE

Član 1. (Predmet Odluke)

Ovom Odlukom uređuje se način i postupak ostvarivanja prava državnih službenika u institucijama Bosne i Hercegovine na naknadu za obavljanje poslova drugog radnog mjesta, u skladu sa članom 38. Zakona o plaćama i naknadama u institucijama Bosne i Hercegovine.

Član 2. (Uslovi za ostvarivanje prava na naknadu)

Naknada za privremeno obavljanje poslova drugog državnog službenika može se odobriti samo u slučaju kada je raspisan konkurs za popunjavanje konkretnog radnog mjesta i pribavljena saglasnost Agencije za državnu službu Bosne i Hercegovine.

Član 3. (Visina naknade)

(1) Državni službenik koji privremeno obavlja posao drugog državnog službenika, ima pravo na naknadu za obavljanje poslova drugog radnog mjesta do 35% od njegove osnovne neto plaće, izuzimajući novčanu nagradu. Visinu pojedinačne naknade utvrđuje rukovodilac institucije posebnim rješenjem.

(2) Pod osnovnom neto plaćom državnog službenika, u smislu člana 38. Zakona o plaćama i naknadama u institucijama Bosne i Hercegovine, podrazumijeva se osnovna neto plaća državnog službenika koji privremeno obavlja posao drugog državnog službenika.

Član 4. (Trajanje prava)

(1) Naknada državnom službeniku koji privremeno obavlja poslove drugog državnog službenika, za konkretno nepopunjeno radno mjesto, može se isplaćivati najduže tri mjeseca.

(2) Izuzetno, od odredbe iz stava (1) ovog člana, naknada se može isplaćivati i duže od tri mjeseca ako se radi o obavljanju poslova drugog radnog mjesta, kao privremena zamjena državnog službenika zbog bolovanja ili porodijskog odsustva, u skladu sa zakonom.

Član 5. (Način ostvarivanja prava na naknadu)

Ostvarivanje prava na naknadu za obavljanje poslova drugog radnog mjesta vrši se donošenjem odgovarajućeg rješenja od strane rukovodioca institucije uz prethodnu saglasnost Agencije za državnu službu Bosne i Hercegovine.

Član 6.
(Obračun i isplata naknade)

Obračun i isplata naknade za obavljanje poslova drugog radnog mjesta za državne službenike u institucijama Bosne i Hercegovine vrši se uz mjesečni obračun i isplatu plaća i naknada zaposlenih u institucijama Bosne i Hercegovine na osnovu rješenja izdatog od strane rukovodioca institucije i pismene saglasnosti Agencije za državnu službu Bosne i Hercegovine.

Član 7.
(Institucije odgovorne za provođenje Odluke)

Za realizaciju ove Odluke zadužuju se institucije Bosne i Hercegovine i Ministarstvo finansija i trezora.

Član 8.
(Stupanje na snagu)

Odluka stupa na snagu narednog dana od dana objavljivanja u "Službenom glasniku BiH".

VM broj 170/09
17. juna 2009. godine
Sarajevo

Predsjedavajući
Vijeća ministara BiH
Dr. Nikola Špirić, s. r.
